



DEO OPTIMO MAX.  
UNI ET TRINO.

VIRGINI DEI-PARÆ, ET S. LUCE  
Orthodoxorum Medicorum Patrono.

QUÆSTIO MEDICA,

Æ CARDINALITIIS DISPUTATIONIBUS  
*manè discutienda in Scholis Medicorum, die Jovis decimâ - quintâ mensis  
Martii, anno Domini M. DCC. LIII.*

M. MICHAËLE - PHILIPPO BOUVART,  
Professore Regio, & Regiæ Scientiarum Academiæ Socio,  
Doctore Medico, Præsîde.

*An Vestes pelliceæ sint salubres?*

I.



ULLAM primævi homines callebant artem, præter  
eam quâ vitæ providebatur. Artem sanè simplicissimam;  
erant enim illis pro cibo fructus spontanei, & plantæ;  
pro potu rivulorum aqua; pro lecto humus. Nullis tunc  
induebantur vestimentis, quæ nec posceret genuinum  
corporis robur, aut nuditatis pudor. Fortunati dies! quibus ficticias

A

virtutes nundum excogitaverat morum perversitas, nulloque velata panno colebatur innocentia. Verum cheu quàm brevi evanuit ætas hæc aurea! crescente hominum numero, primigenia decrevit simplicitas. Novæ sensim irrepserunt virtutum titulo, vivendi normæ. Hinc pudor antea ignotus, à quo vestimentorum necessitas. Cum verò in rerum primordiis, infecunda hominum industria, nondum mirabiles illas procreaverat artes, quibus omnis ferè generis conficiuntur panni; foliis arborum, animaliumque spoliis utebantur. Is primus fuit sese vestiendi modus. Nostris adhuc existunt temporibus errabundæ gentes, solo lacte, caseoque vescentes, quibus domus sunt plaustra, vestimenta que, ferarum aut pecudum exuvix. Dispar sanè nostra vivendi ratio; paucis nihilominus ab hinc annis, animalium pellium usus apud nos invaluit. Quod quidem vestium genus, multi dederunt ostentui, quidam salubritati; quorum opinionem ut saniolem amplectimur.

## I I.

**C**UIVIS Medico nota est transpirationis necessitas. Hæc viâ, superflui, & nocituri humoris pars longè maxima disflatur. Hinc fluidorum cursus expeditior; hinc solidorum motus vegetior; hinc constans inter omnes partes æquilibrium. Verùm hæc suppressâ vel imminutâ excretionem, quæ malorum ilias! Modò sub cute retenta molecularum heterogenearum indigesta moles, cutaneos affectus, scabiem scilicet, impetigines, crespelata; modò membrorum articulis deposita, stagnans, ac hærens, dolores rheumaticos arthricosque pariet. Nunc viscus quodlibet adoritur; illudque obstructionibus, aut inflammationibus exitialibus objicit. Nunc in glandulas ubivis dispersas irruit, diarrhæas, dysenterias, fluores albos, catharros motura. Hæc denique communem in humorum alveum refusa, sanguinem, ceterosque humores inspissat, acrimoniâ diversi generis infestat, putredine corrompit. Frigus ergò perspirationi noxium vitent, quibus caræ est sua valetudo.

## I I I.

**F**RIGORIS asperitatem, si quis solâ accensi ignis vi, arcere studeat, quanto sanitatis detrimento! Corporis calidiore aere circumventi universus dilatatur ambitus; quæ strinxerat frigus, repentè laxat & ampliat cutis ostia, calor. Ad peripheriam serosus humor appellit, avolat; hoc orbat, crassior, immeabilis fit cruor, morbis tam acutis, quàm chronicis causas daturus. Nec minoris est periculi, si quis foràs prodeat, numero, crassitie, pondere vestium, verius onustus quàm

rectus. Hujus gravatum corpus, dolorificâ lassitudine, ad quâlibet exercitia sit ineptius. Nulla ergo tuta adversus frigus præsidia? Habes animalium parata spolia, ex quibus tibi compares vestimenta frigori impervia. Non unus est parandorum modus. Alia pilis orbantur, alia à pilis decus & pretium obtinent. De hisce tantum sermo est. Ad eò autem stricta est in pellibus textura, ut minimos tantum, nec aquæ, nec aeris pervios habeant porulos. His ergo dum sævit hyems, vestiatur corpus. Quid inde boni emerget, vel leviter attendenti patet. Subtilis etenim, calidusque perspirati humoris vapor, villosis sub vestibus retentus, collectus, perpetuam, eodem gradu continuò calentem, beneficamque idcirco, corpori circumtensam constituet atmospheram, quâ salutifera indefinenter fovebitur excretio, frigorisque gravissima præcavebuntur incommoda. Sæviente brumâ suspiciis iter? Galeris operiatur caput, pillosis pellibus circumdetur truncus, chirotecis involvantur manus, faccis ursinis injiciantur crura. quânam ergo parte, tam bene galearum te laceßet frigus? Illud non aliâ ratione avertunt regionum hyperborearum incolæ. Militiæ ascriptus, dura, sed honorifica martis vexilla generosè sequeris; quot & quanta capiti tuo mala imminet! sive à ventorum borealium gelidis afflatibus, sive ab imbribus densissimis, seu denique à frigidis halitibus terræ, quam super cheu! sæpissimè fracta labore membra, somno reficienda, repone funesta cogit necessitas. Vis pessimam hanc in meliorem mutare sortem? pelles indue. Hæc viros fortes ac bellicosos decent vestimenta. Sic hercules olim leonis exuviis erat amictus. Sic ultimo bello vidimus gallicos Heroës, Rege imperante, invictos, pelliceis indutos vestimentis.

## I V.

**N**EC viris tantum utilia existimes vestimenta pellicea. Qui enim pars est generis humani suavior, sexus amabilis, etsi virorum pectoribus ardentes incutere flammæ sit habilis; non ideo gerit in se, unde propriâ virtute, frigoris externi arceat incommoda. Quæ quidem eo majora sunt, ac frequentiora in tenero hoc sexu, quod, cum sint in illo fibræ tenuiores, & sensus exquisitioris, multò vidius ab externis afficiatur. Animalium ergo pellibus, totâ hyeme, obtegantur mulieres. His involutæ manus earum, candidæ, delicatæque servantur. His palliolorum nomine operiantur humeri, ne frigoris immitis vi, pectoris nivei contracta cutis, rugosa fiat, & aspera. O utinam vestium pellicearum utilitatem, frequentiori didicerint experientiâ, mulieres! Quot menstruorum suppressiones, hystericæ passionés, sterilitates, chloroses præverterentur. Nondumne pellicearum vestium demonstrata sunt commoda? Felicissimos interrogas

4

practicos. Illi non in statu sano tantum has commendant, at in morbis quibusdam, veluti prophylactica præscribunt remedia. Sic in cephalalgia pertinaci, talpæ cutim; in dolore rheumatico, leporis; in paralyfi, felis feræ pelles, partibus affectis applicari satagunt.

V.

**N**OSTRAM de pellicearum vestium utilitate sententiam, frequens ac felicissimus, jamjam confirmavit usus. Quid ergo conclusioni nostræ obstat? An istud vulgi imperiti tritum? Mulierum scilicet candidam ac lævem cutem, villosis deturpari palliolis, rubore ingrato, & papulis dehonestari. Quasi vero in palliolos hoste, non verò in ipsum frigus imprudenter admissum, objecta refundi deberent incommoda. Forte sic insurgent quidam: cunctis salubria prædicas vestimenta, quæ temperamentis calidis officiant. Ea enim, excretionem jam satis largam adaugendo, serosâ sanguinis parte orbas, morbisque inflammatoriis præbes occasionem. Hoc quàm nihili sit, quis non percipiat? Vestes pellicæe nihil intus addunt corpori, unde velocior exurgat liquorum motus, at remouent humoribus ad peripheriam appellentibus impedimenta. Præterea quo copiosior est in calidis perspiratio, eò pluris interest ne impediatur. Omissis aliis id genus difficultatibus, ne nugis immorari videamur, concludimus.

*Ergò Vestes pellicæe sunt salubres.*

Proponebat Parisiis JOANNES-LUDOVICUS-MARIA SOLIER;  
Aurelius, Doctor Medicus Remensis, necnon Saluberrimæ Facultatis Medicinæ  
Parisiensis Baccalaureus, Theses Author, A. R. S. H. 1753.

A SEXTA AD MERIDIEM.